



REPUBLIKA E SHQIPËRISË
KONTROLLI I LARTË I SHTETIT
KRYETARI

Nr. 8/ prot.
9

Tiranë, më 30/10/2020

V E N D I M

Nr. 115, Datë 30/10/2020

PËR
EVADIMIN E MATERIALEVE TË AUDITIMIT TË PERFORMANCËS
“Efektiviteti i Procesit të Deinstitutionalizimit dhe Decentralizimit të
Shërbimeve Shoqërore me Fokus Fëmijët Jetim”

Në zbatim të planit vjetor, Kontrolli i Lartë i Shtetit, në kuadër të përmbushjes së funksionit të tij Kushtetues, zbatimit të Udhëzimeve dhe Standardeve Ndërkombëtare të Auditimit (INTOSAI, EUROSAI, etj.), sipas Programit të Auditimit nr. 8/4, datë 13.05.2020 realizoi auditimin e performancës me temë “Efektiviteti i Procesit të Deinstitutionalizimit dhe Decentralizimit të Shërbimeve Shoqërore me Fokus Fëmijët Jetim”. Subjektet në auditim ishin: Ministria e Shëndetësisë dhe Mbrojtjes Sociale, Shërbimi Social Shtetëror. Kontrolli i Lartë i Shtetit, në këtë auditim synoi të vlerësonte efektivitetin e procesit të deinstitutionalizimit dhe decentralizimit të shërbimeve shoqërore për fëmijët jetimë në vendin tonë për periudhën 2016 – 2019.

Pas përfundimit të punës paraprake audituese u përgatit programi auditues nr. prot. 8/4, datë 13.05.2020. Në përfundim të punës audituese në terren, me shkresat nr. 8/5, dhe 8/6, datë 30.06.2020, projekt-raporti i auditimit iu dërgua institucioneve subjekt auditimi.

Raporti i auditimit është hartuar pasi janë shqyrtuar komentet e dërguara subjektet nën auditim. Shërbimi Social Shtetëror, ka paraqitur komente nr. prot. 9/3, datë 15.07.2018, protokolluar në KLSH me nr. prot. 8/6, datë 16.07.2020. Ministria e Shëndetësisë dhe Mbrojtjes Sociale ka paraqitur komente dërguar me shkresën nr. prot. 42/4, datë 30.07.2020.

Në përfundim, pasi u njoha me raportin përfundimtar të auditimit dhe projekt-vendimin e paraqitur nga grupi i auditimit të Departamentit të Auditimit të Performancës, shpjegimet e dhëna nga subjektet e audituara, mendimin për cilësinë e auditimit nga Drejtori i Drejtorisë së Standardeve dhe Sigurimit Cilësisë, vlerësimin mbi objektivitetin dhe cilësinë e auditimit nga Kryeaudituesi, Drejtori i Departamentit të Auditimit dhe Drejtori i Përgjithshëm, në mbështetje të neneve 10, 13, 15, 25 dhe 30 të Ligjit nr. 154/2014, “Për organizimin dhe funksionimin e Kontrollit të Lartë të Shtetit”:

KONKLUDOVA

Vlerësimi i efektivitetit të procesit të deinstitutionalizimit dhe decentralizimit të shërbimeve të përkujdesit shoqëror për fëmijët jetim në vendin tonë është analizuar në drejtim të planifikimit të saktë të procesit të deinstitutionalizimit dhe decentralizimit të shërbimeve të përkujdesjes sociale për fëmijët jetim dhe atë të progresit të arritur në zbatimin të masave të marra për këto procese.

Sa i takon drejtimin të parë, i cili lidhet me plotësinë dhe qartësinë e të gjithë akteve ligjore e normative në fuqi, si dhe planifikimit të kapaciteteve financiare dhe operacionale për këtë qëllim, në mënyrë të përmbledhur, rezultoi se ka patur paqartësi dhe vonesa në ngritjen dhe funksionimin e kuadrit strategjik, ligjor dhe rregullator dhe mungesë planifikimi e analizimit të situatës nga këndvështrimi financiar dhe operacional. E gjithë reforma, duke mos qenë e mbështetur në objektiva strategjik me planet e veprimtari specifike lidhur me procesin e deinstitutionalizimit dhe decentralizimit sipas udhëzuesve të BE¹ dhe parimeve të tyre, nuk ka pasur rezultate pozitive. Mungesa e një studimi të mirëfilltë për evidentimin e përfitimeve financiare të deinstitutionalizimit, ka penalizuar konkretizimin e këtij objekti duke mos prodhuar efektin e dëshiruar në uljen e numrit të fëmijëve të institucionalizuar dhe rritjen e atyre të vendosur në familje kujdestare. Sa i takon sigurimin të burimeve njerëzore të përshtatshme dhe të mjaftueshme për përmblylljen me sukses të reformave të deinstitutionalizimit dhe decentralizimit rezultoi se nuk është ndërmarrë nga MSHMS, SHSSH dhe NJVQV asnjë iniciativë domethënëse në këtë drejtim. Edhe për tre vjeçarit 2020 – 2023 fokus i qeverisë mbetet sërish ngritja e kapaciteteve.

Lidhur me drejtimin e dytë, është marrë në vlerësim përmbushja konkrete e dy objektivave të reformës, pra deinstitutionalizimi dhe decentralizimi. Për procesin e deinstitutionalizimit është konstatuar se mungesa e politikave sociale me fokus varfërinë ka shkaktuar edhe numrin më të lartë të braktisjeve të fëmijëve në institucione. Veprimet e ndërmara në kuadër të hartimit të akteve ligjore dhe rregullator janë ende larg arritjes së objektivit të mbylljes së qendrave rezidenciale, si dhe nuk nxisin kalimin e fëmijëve jetimë drejt familjeve kujdestare apo rikthimin e tyre në familjet biologjike. Konsiderimi i institucionalizimit si opsioni i parë dhe investimet e çfarëdoshme në këtë aspekt, janë një tregues për politika sociale të dobëta dhe dhunimit të të drejtave të fëmijës. Rënia e numrit të fëmijëve të rikthyer në familjet biologjike apo të birësuar dhe njëkohësisht rritja e numrit të fëmijëve të institucionalizuar dëshmon për një mungesë vëmendje dhe një punë të dobët të institucioneve përgjegjëse lidhur me këtë çështje. Për periudhën objekt auditimi procesi i deinstitutionalizimit mund të konsiderohet i dështuar.

Ndërkohë për procesin e decentralizimit u vu re se, varësia e dyfishtë e IPSH-ve aktuale sjell vështirësi në menaxhimin e përditshëm të tyre, në përzgjedhjen dhe emërimin dhe kërkesën e llogarisë për personelin të përkujdesit, të cilat ndikojnë drejtë për së drejti në mirëqenien e fëmijëve. Mos hartimi i listave të familjeve kujdestare potenciale nuk mundëson deinstitutionalizimin e fëmijëve të cilët nuk mund të kthehen në familjet biologjike apo në familje me lidhje gjaku. Shërbimet aktuale të ofruara në institucionet rezidenciale, janë fokusuar tek përkujdesi fizik dhe jo tek zhvillimi individual. Gjithashtu programet dhe shërbimet në institucionet aktuale rezidenciale janë ngritur për t'ju shërbyer fëmijëve jetimë biologjike dhe jo fëmijëve të abuzuar, shfrytëzuar, neglizhuar apo me sjellje të dëmshme. Fëmijët qëndrojnë për një periudhë të gjatë në institucione rezidenciale si rezultat i paqartësive ligjore dhe procedurave të ndjekura nga institucione të ndryshme në lidhje me kujdestarinë e fëmijës. Jo të gjithë NJVQV-të kanë krijuar struktura të përshtatshme për t'u marrë me çështje sociale. Problematika kryesore e hasur gjatë procesit të decentralizimit është se përveç faktit të mungesës së burimeve

¹ <http://enil.eu/wp-content/uploads/2016/09/Guidelines-01-16-2013-printer.pdf>

njerëzore, mungojnë dhe burimet financiare, pra bashkitë nuk janë të gatshme të marrin përgjegjësinë e vazhdimësisë së shërbimeve për qendrat që ende janë në varësi të SHSSH dhe financohen nga buxheti qendror.

Në lidhje me pyetjen kryesore të këtij auditimi, ***A KANË REZULTUAR EFEKTIVE MASAT E MARRA PËR REALIZIMIN E PROCESIT TË DEINSTITUCIONALIZIMIT DHE DECENTRALIZIMIT E SHËRBIMEVE TË PËRKUJDESIT SHOQËROR PËR FËMIJËT JETIM NË VENDIN TONË PËR PERIU DHËN 2016 - 2019?*** u arrit në këtë mesazh auditimi:

Masat e marra nga institucionet përgjegjëse për proceset e deinstitutionalizimit dhe decentralizimit të shërbimeve shoqërore për fëmijët jetim në vendin tonë, jo vetëm nuk ka qenë efektive, por edhe janë shoqëruar me propagandë fiktive për realizimin e tyre. Indiciet e para të ndërmarrjes së kësaj reforme vihen re që në vitin 2003, dhe ende pas 17 vitesh nuk ka rezultate. Vetëm në vitin 2020 është hartuar një Draft Plan për deinstitutionalizimin. Institucionet shtetërore duhet të marrin hapa serioze në drejtim të kryerjes së këtyre proceseve pasi, institucionalizimi, përveçse është një dhunim i të drejtave të fëmijëve të të gjitha kategorive, ka pasoja serioze psiko – sociale për zhvillimin e tyre.

Nisur nga konkluzionet e mësipërme të veprimtarisë audituese, duke synuar përmirësimin e mëtejshëm të rezultateve:

V E N D O S A:

I. Të miratoj Raportin e Auditimit me temë *“Efektiviteti i Procesit të Deinstitutionalizimit dhe Decentralizimit të Shërbimeve Shoqërore me Fokus Fëmijët Jetim”*, të ushtruar në Ministrinë e Shëndetësisë dhe Mbrojtjes Sociale dhe Shërbimin Social Shtetëror.

II. Të miratoj rekomandimet e përcaktuara dhe të kërkoj marrjen e masave për sa vijon:

A. PROPOZIME PËR NDRYSHIME APO PËRMIRËSIME NË LEGJISLACIONIN NË FUQI

Për Pyetjen: A është ngritur një plan strategjik, kuadër ligjor dhe rregullator me objektiva dhe plane veprimi konkrete?

Gjetje:

- ✓ Në ligjin nr. 8153, datë 31 tetor 1996, “Mbi statusin e jetimit”, i ndryshuar, nuk bëhet një diferencim i qartë i kategorive të ndryshme të fëmijëve jetim biologjik dhe social. Gjithashtu në këtë ligj nuk përcaktohen saktë kriteret për kategoritë që përfitojnë statusin e jetimit.
- ✓ Në kundërshtim me nenin 51 të ligjit 121/2016, Këshilli i Ministrave nuk ka miratuar brenda afatit ligjor të parashikuar aktet nënligjore si vijon: për kushtet dhe mënyrën e ofrimit të shërbimit komunitar; për kriteret dhe procedurat e pranimit në qendrat rezidenciale dhe për përdorimin e shërbimeve në komunitet; për metodologjinë e llogaritjes së fondeve për financimin e shërbimeve të kujdesit shoqëror; për procedurat e krijimit e të funksionimit të Fondit Social; për kriteret, dokumentacionin dhe procedura që do të ndiqet nga strukturat e shërbimeve shoqërore të organeve të njëjësive të qeverisjes vendore, për evidentimin e familjeve kujdestare, si dhe masën e financimit për

shpenzimet e fëmijës të vendosur në familje kujdestare²; për rregullat specifike të funksionimit e të administrimit të Regjistrimit Elektronik Kombëtar; për organizimin dhe funksionimin e komisioneve multidisiplinare; për procedurat dhe zbatimin e standardeve të shërbimeve; për regjistrin e profesionistëve së bashku me rregulloren për procedurat e regjistrimit të profesionistëve të shërbimeve të kujdesit shoqëror.

- ✓ Në kundërshtim me pikën 29, neni 3 të ligjit 121/2016, Këshilli i Ministrave nuk ka miratuar vendimin për përcaktimin e kriterëve për llojet e ndryshme të ndryshme të shërbimeve.
- ✓ Në kundërshtim me nenin 52 të ligjit 121/2016 nuk janë transferuar brenda dy viteve nga hyrja në fuqi e këtij ligji, të gjitha qendrat rezidenciale dhe ofrimi i shërbimeve rezidenciale nga pushteti qendror në atë vendor.
- ✓ Në kundërshtim me Nenin 52 të ligjit 121/2016 brenda dy viteve nga hyrja në fuqi e këtij ligji, të gjitha qendrat rezidenciale dhe ofrimi i shërbimeve rezidenciale duhet t'u transferoheshin NjVQV.

Për këtë rekomandoj:

- MSHMS të marrë të gjitha masat e duhur që në zbatim të pikës 29, neni 3 të ligjit 121/2016, të miratojë vendimin për përcaktimin e kriterëve për llojet e ndryshme të ndryshme të shërbimeve.

Menjëherë

- MSHMS dhe SHSSH të ndërmarrë të gjitha iniciativat e nevojshme për të rishikuar Ligjin nr. 8153, datë 31 tetor 1996, "Mbi statusin e jetimit", i ndryshuar, duke reflektuar në të ndryshimet përkatëse në terminologji dhe kriterë të përfitimit të statusit, nisur nga fakti se termi "jetim" nuk përmendet në asnjë dokument ndërkombëtar dhe as në Kodin e Familjes.

Brenda vitit 2021

Për Pyetjen: A janë parashikuar burimet financiare dhe operationale të mjaftueshme dhe të nevojshme për kryerje e këtyre proceseve?

Gjetje:

- ✓ MSHMS dhe SHSSH, për periudhën objekt auditimi, nuk kanë kryer një studim me qëllim evidentimin e përfitimeve financiare të deinstitutionalizimit.
- ✓ Kosto vjetore e mbajtjes së fëmijës në qendër rezidenciale ka diferenca ndër rrethe: kosto për një fëmijë në Tiranë është shumë më e lartë nga kostoja për fëmijë në rrethe të tjera, duke mos pasqyruar drejtë koston e jetesës në rrethe të ndryshme.
- ✓ Për qytetin e Tiranës, për 1 fëmijë të trajtuar në rezidencë mund të vendosen në kujdestari 9 fëmijë. Ndërkohë për qytetin e Korçës për çdo fëmijë të trajtuar në rezidencë mund të vendosen në kujdestari 4 deri në 5 fëmijë.
- ✓ Vlera e masës së financimit për familjet kujdestare nuk ka ndryshuar në vite duke mos reflektuar impaktin e inflacionit.

Për këtë rekomandoj:

² Ky vendim është miratuar dy vite pas hyrjes në fuqi të këtij ligji. Shih VKM nr 149 datë 13.03.2018 "Kriteret, dokumentacionin dhe procedurat për evidentimin e familjes kujdestare për fëmijët pa kujdes prindëror dhe masës së financimit për shpenzimet e fëmijës së vendosur në familje kujdestare", i ndryshuar

- MSHMS, në bashkëpunim me NJVQV, të vlerësojë mundësinë e rishikimit të VKM nr. 149, datë 13.03.2018 “Për kriteret, dokumentacionin dhe procedurat për evidentimin e familjes kujdestare për fëmijët pa kujdes prindëror dhe masës së financimit për shpenzimet e fëmijës së vendosur në familje”, sa i takon masës së financimit për familjet kujdestare në varësi të kostove të ndryshme të jetesës në qytete të ndryshme.

Qershor 2021

- MSHMS të marrë të gjitha masat me nevojshme me qëllim rishikimin e VKM nr. 149, datë 13.03.2018 “Për kriteret, dokumentacionin dhe procedurat për evidentimin e familjes kujdestare për fëmijët pa kujdes prindëror dhe masës së financimit për shpenzimet e fëmijës së vendosur në familje”, sa i takon reflektimit të impaktit të inflacionit në masën e financimit për familjet kujdestare.

Qershor 2021

B. MASA ORGANIZATIVE

Për Pyetjen: A është ngritur një plan strategjik, kuadër ligjor dhe rregullator me objektiva dhe plane veprimi konkrete?

Gjetje:

- ✓ Numri i fëmijëve jetim që kanë përfituar statusin ndër vite si rezultat i lindjes jashtë martese është më i lartë krahasuar nga kategoritë e tjera të jetimëve.
- ✓ Procesi i përfitimit të shërbimeve sociale nis pranë PMF në NJVQV me referimin e rastit dhe vlerësohet për vendimmarrje pranë SHSSH – së.
- ✓ Nuk është ngritur sistemi i integruar i shërbimeve të kujdesit social në njësitë e qeverisjes vendore në zonat e përzgjedhura deri në 2017 dhe në nivel kombëtar deri në 2020, kur detyrimi ligjor ishte deri në 2018;
- ✓ Nuk janë rishikuar funksionet e planifikimit dhe ofrimit të shërbimeve të kujdesit social për nivele të ndryshme të qeverisjes vendore dhe modele të reja në zbatim deri në 2017;
- ✓ Nuk është ngritur sistemi i informacionit në nivel rajonal dhe qendror për të identifikuar nevojat për shërbime të përkujdesjes shoqërore deri në 2018.

Për këtë rekomandoj:

- ✓ MSHMS, SHSSH dhe NJVQV të marrin të gjitha masat e nevojshme për të përfshirë fëmijët jetim në proceset e hartimit, zbatimit dhe vlerësimit të politikave/programeve për ta, si në nivel qendror ashtu edhe në nivel vendor.

Në vazhdimësi

- ✓ MSHMS dhe SHSSH në bashkëpunim me NJVQV të veprojnë me qëllim ngritjen e sistemit të integruar të shërbimeve të kujdesit social në njësitë e qeverisjes vendore.

Brenda vitit 2020

- ✓ MSHMS dhe SHSSH në bashkëpunim me NJVQV të marrin masa për të vënë plotësisht në funksionim regjistrin elektronik kombëtar.

Menjëherë

- ✓ NJVQV të veprojnë për të miratuar vendimin për tarifën e shërbimeve të kujdesit shoqëror.

Menjëherë

Për Pyetjen: A janë parashikuar burimet financiare dhe operationale të mjaftueshme dhe të nevojshme për kryerje e këtyre proceseve?

Gjetje:

- ✓ MSHMS, SHSSH dhe NJVQV nuk kanë kryer asnjë analizë financiare dhe të burimeve njerëzore sa i takon deinstitutionalizimit sipas komponentëve të parashikuar nga Udhëzuesi i përbashkët Evropian për kalimin nga kujdesi institucional në kujdesin me bazë komunitare.
- ✓ Edhe për realizimin e procesit të decentralizimit evidentohet mungesa e burimeve njerëzore të përshtatshme dhe të nevojshme në nivel vendor për të kryer analizën e nevojave me qëllim hartimin e planeve sociale.

Për këtë rekomandoj:

- MSHMS dhe SHSSH të kryejnë një studim me qëllim evidentimin e përfitimeve financiare të deinstitutionalizimit.

Dhjetor 2020

- MSHMS, SHSSH dhe NJVQV të kryejnë analiza financiare dhe të burimeve njerëzore lidhur me deinstitutionalizimit sipas komponentëve të parashikuar nga Udhëzuesi i përbashkët Evropian për kalimin nga kujdesi institucional në kujdesin me bazë komunitare.

Qershor 2021

Për Pyetjen: A është realizuar sipas objektivave vendosja në përkujdesje alternative e fëmijëve jetim?

Gjetje:

- ✓ MSHMS nuk ka patur një përkufizim të qartë dhe konciz mbi parimin e deinstitutionalizimit, çfarë nënkupton dhe çfarë synon ai.
- ✓ MSHMS nuk ka patur asnjë dokument me objektivë konkrete, apo hapa të qartë mbi atë se çfarë do ta quante të përmbushur reformën e deinstitutionalizimit për fëmijët jetimë.
- ✓ Numri i fëmijëve jetim social ka qenë gjithnjë shumë më i lartë se i atyre jetimë biologjik.
- ✓ MSHMS nuk ka hartuar masa konkrete dhe as një udhëzues se si do të kryhet procesi i deinstitutionalizimit.
- ✓ MSHMS dhe SHSSH nuk kanë marrë masa për analizimin e situatës me fokus përfitimet e deinstitutionalizimit dhe dëmet e institucionalizimit.
- ✓ MSHMS, SHSSH dhe NJVQV nuk kanë kryer një studim sa i takon ndikimit të varfërisë në progresin e procesit të deinstitutionalizimit.
- ✓ MSHMS dhe NJVQV nuk kanë kryer një planifikim se si do të kryhet mbështetja e individëve gjatë tranzicionit nga institucioni në përkujdesje alternative.
- ✓ MSHMS dhe NJVQV nuk kanë ndërmarrë fushata agresive sensibilizuese për nxitjen e kulturës së ofrimit vullnetar të familjeve kujdestare të përkohshme por edhe të përhershme.
- ✓ Për periudhën objekt auditimi numri i fëmijëve të rikthyer në familjet biologjike apo të birësuar ka ardhur në rënie ndërkohë që numri i fëmijëve të institucionalizuar ka ardhur në rritje.

Për këtë rekomandoj:

- MSHMS dhe NJVQV të marrin masa për hartimin e programeve proaktive për rritjen e përgjegjshmërisë prindërore, parandalimin e ndarjes së familjes, mbështetjen e nevojshme financiare të tyre për të garantuar mos braktisjen e fëmijës, si dhe promovimin e riintegrit të konceptit të familjes.

Qershor 2021

- MSHMS dhe NJVQV të marrin masa për ofrimin e qendrave të këshillimit psiko - social që në maternitet për nënat që rrezikojnë të braktisin fëmijët.

Brenda vitit 2020

- MSHMS dhe NJVQV të ndërmarrin fushata agresive sensibilizuese për nxitjen e kulturës së ofrimit vullnetar të familjeve kujdestare të përkohshme por edhe të përhershme

Menjëherë dhe në vazhdim

- MSHMS dhe NJVQV të marrin në vlerësim mundësinë e ngritjes së kapaciteteve të nevojshme për kalimin e çështjeve të dhënies së kujdestarisë nga gjyqësore në administrative.

Qershor 2021

- MSHMS të marrë masa për miratimin dhe vënien në zbatim të menjëhershëm të Planit Kombëtar të Deinstitutionalizimit 2020 - 2023.

Menjëherë

Për Pyetjen: A janë ngritur dhe kanë funksionuar strukturat e nevojshme pranë NJVQV në funksion të përmbushjes së objektivit të decentralizimit?

Gjetje:

- ✓ Tre prej IPSH-ve janë në varësi të Shërbimit Social Shtetëror dhe 6 janë në varësi të dyfishtë midis SHSSH dhe njësive të vetë qeverisjes vendore;
- ✓ Mungojnë shërbimet të kostuara të standartizuara të specializuara për fuqizimin e familjeve në të gjitha njësitë e vetëqeverisjes vendore;
- ✓ Në asnjë njësi të vetëqeverisjes vendore nuk janë ngritur shërbimet e standartizuara dhe të kostuara për prindërimin pozitiv, trajtimin e varësive së prindërve, trajtimin e prindërve shfrytëzues abuzues dhe ose trajtimin e agresivitetit të të rriturve;
- ✓ Ka një numër shumë i vogël i familjeve kujdestare pa lidhje gjaku (më pak se 10 në të gjithë Shqipërinë);
- ✓ Asnjë njësi e vetëqeverisjes vendore nuk ka hartuar dhe miratuar listën e familjeve kujdestare pa lidhje gjaku;
- ✓ Bashkia Vlorë:
 - nuk ka kapacitetet për referimin e rasteve dhe vlerësimin e nevojave;
 - ka vështirësi në identifikimin e rasteve në nevojë pasi mungojnë burimet e informacionit;
 - nuk ekziston kujdestaria alternative, nuk është hartuar lista e familjeve kujdestare potenciale dhe nuk janë marrë fushata ndërgjegjësimi për promovimin e përkujdesjes alternative;
 - nuk ka dijeni për numrin e fëmijëve që institucionalizohen dhe deinstitutionalizohen;
 - merret vetëm me hartimin e planit individual për mbrojtjen e fëmijës dhe jo atë për zhvillimin e tij;
 - punonjësit nuk janë trajnuar për përdorimin e regjistrit elektronik të shërbimeve shoqërore miratuar me VKM 136/2018;
 - nuk ka kryer një analizë për burimet financiare dhe njerëzore të nevojshme si dhe nuk janë realizuar trajnimet e nevojshme të stafit;
- ✓ Bashkia Korçë:
 - ka vështirësi në identifikimin e rasteve në nevojë pasi mungojnë burimet e informacionit;

- pavarësisht fushatave ndërgjegjësuese si pasojë mungesës së interesit nga komuniteti ende nuk ekziston kujdestaria alternative dhe nuk ka një listë të familjeve kujdestare potenciale të interesuara;
- kanë munguar trajnimet për përdorimin e fondit social dhe regjistrin elektronik të shërbimeve shoqërore, si edhe nuk është aplikuar për fonde nga fondi social.

Për këtë rekomandoj:

- SHSSH në bashkëpunim me NJVQV përkatëse të marrë të gjitha masat e nevojshme për kalimin në administrim të plotë të tre IPSH – ve që janë ende në varësi të SHSSH.

Qershor 2021

- ✓ Të gjitha NJVQV, krahas hartimit të planit të mbrojtjes së fëmijës, të marrin të gjitha masat e duhura për të hartuar edhe planet e zhvillimit individuale të tyre, SHSSH të mbështesë dhe të monitorojë hap pas hapi të gjithë procesin e hartimit, miratimit dhe zbatimit të tyre, duke ndihmuar në këtë mënyrë kalimin gradual në administrim të NJVQV.

Qershor 2021

- ✓ Të gjitha NJVQV, në bashkëpunim me SHSSH, të promovojnë kujdestarinë alternative duke vendosur theksin tek mbështetja financiare e ofruar nga shteti shqiptar për familjet kujdestare

Menjëherë dhe në vazhdimësi

- ✓ Të gjitha NJVQV, në bashkëpunim me SHSSH, të kërkojnë me këmbëngulje të gjithë mbështetjen e nevojshme nëpërmjet trajnimeve apo asistencës teknike me qëllim përdorimin e Regjistrin Kombëtar Elektronik dhe adresimin e kërkesave për fondin social.

Menjëherë dhe në vazhdimësi

Në përputhje me nenin 30 të Ligjit 154/2014 “Për Organizimin dhe Funkcionimin e Kontrollit të Lartë të Shtetit”, me ndjekjen dhe kontrollin e zbatimit të detyrave dhe masave të përcaktuara në këtë vendim, ngarkohet Departamenti i Auditimit të Performancës.

K R Y E T A R

Arben SHEHU